

I N F U N E R E
VICTORII AMADEI III.
S A R D I N I A E R E G I S

O R A T I O

HABITA IN SACELLO QUIRINALI
AD SANCTISSIMUM DOMINUM NOSTRUM


PIUM SEXTUM
P O N T. M A X.

A TIBERIO PICCOLOMINI
INTIMO EJUSDEM SANCTITATIS SUAE
CUBICULARIO



R O M A E

A P U D L A Z A R I N O S
M. DCC. XCVII.



Luigi Sabatelli inv.

Carlo Antonini inc.

PIO SEXTO

PONTIFICI MAXIMO

TIBERIUS PICCOLOMINI

N. M. Q. E.

DICATISSIMUS



ULTA jamdiu me admone-
bant, ut aliquam Tibi pro
plurimis Tuis, ac praeclaris in me meri-
tis contenderem grati animi significationem

exhibere . Etenim cum primum ecclesiastici , ut vocant , hominis agendas partes suscepi in hac Catholicae Religionis Sede , atque arce munitissima , eximia statim singularis beneficentiae erga me Tuae expertus sum argumenta , cum scilicet Te mandante ad eum legatus sum profectus , quem Tupridem in sacrum Eminentissimorum Patrum Collegium cooptaveras . Ex illo jam tempore vix dici potest quanta me semper facilitate , quantaque indulgentia sis persecutus . Videbam interim testificandae meae in Te voluntatis nullam satis idoneam mihi copiam suppetere ; qui nondum prorsus confirmata aetate , nec ingenio doctrinaeque copia , nec rerum usu atque experientia valerem , quibus fretus quidquam tandem conari possem , quod ab Augustissimi , deque me optime meriti Principis dignitate non abhorreret . Tot hisce ad perficiendum , quod mihi maxime erat in votis , et

I I I

esse oportebat , difficultatibus et obstaculis occurrit in tempore eadem illa comitas Tua , qua ego antea semper usus fueram longe liberalissima . Cum enim humanissimis ultro verbis me jussisti funebri laudatione prosequi amplissimum probatissimumque Regem VICTORIUM AMEDEUM , cui Tute solemni parentare pompa statuisses , viam tum mihi visus es explanare , per quam gravissimo itemque honestissimo in Te officio demum satisfacere ex sententia possem : si nempe quae de illo dixissem coram Te eidem justa solvente , typis exinde mandata Tibi inscriberem Tuo patrocinio tuenda , Tuoque nomine commendanda . Ita plane intelligebam fore ut expressa in Te extaret imago supremi illius bonorum omnium Datoris , cujus fungeris vice in terris , quique non recusat quin homines eisdem Numen suum donis profiteantur , et colant , quae ab una ipsius munificentia

acceperunt : Ipsam itidem liberalem op-
 pido et egregiam animi tui magnitudinem
 omnes suspexere quotquot vel ab exteris ter-
 rarum plagis Te hactenus convenerunt viri
 principes , et non vulgari sapientiae atque
 eruditionis laude praestantes , vel solertissi-
 mum Moderatorem , et amantissimum nacti
 sunt Pastorem ac Patrem . Quanta exinde
 accesserit artibus optimisque disciplinis co-
 pia et alacritas , quae nova soli ubertas ;
 quaeque Urbis dignitas atque amplitudo ex-
 titerit , neque instituti mei est hoc loco ef-
 ferre , neque efferri tua moderatio patitur :
 Haec certe aliaque bene multa ingenii tui
 vere magni ac munificentissimi documenta
 praedicabit sera posteritas : ubi autem nove-
 rit ea Te praestitisse temporibus difficillimis ,
 atque immani curarum mole obrutum ac va-
 rietate distentum , aequanimitatem illam mi-
 rabitur singularem , quam nihil quantumvis
 asperum ac salebrosum commovere aut exte-

V


nuare unquam potuit , quaque factum est , ut quae communi bono cognosceres expedire , christianaeque Reipublicae columen et incrementum spectare mature omnia provide-
ris et apprime perfeceris . Ego vero eo Tibi me plus debere existimabo ; quo minus in me esse facultatis perspexero ad quamvis minimam promeritis Tuis gratiam referendam . Illud praeterea mihi optatissimum maximeque opportunum video contingere, quod tenue hoc ingenii , et diligentiae meae specimen aequo Te animo excepturum certo scio , quippe quod quantumcumque est ; dici haberique vere potest Tuum . Attamen tot licet tantisque clementiae Tuae monumentis auctus , et cumulatus aliquid mihi animadverto in posterum desiderandum superesse , ut videlicet talem me aliquando praestare valeam , qualem Tu beneficiis in me conferendis esse voluisti . Id ferme est ; quod jam nunc , et vehementer exopto , et

ad Tuæ Sanctitatis Pedes provolutus polliceor ex animo , et Deo auspice a me perfectum iri confido ; quem quidem enixe rogare non desinam , ut Te diu sospitet , novisque in dies opibus ditet infinitæ largitatis suæ ad bonorum omnium solatium , ad populi Romani incolumitatem et decus , ad universæ Ecclesiæ praesidium , et ornamentum .





ORATIO



Apientissimo Dei O. M. consilio
factum est, BEATISSIME PA-
TER, ut ea aetate cum effraenis
novandarum rerum libido dominatur, cum tanquam
infesta Reipublicae bono Regum jura traducuntur,
cum regium nomen quasi aliquod servitutis signum
delendum esse contenditur; ea, inquam, aetate re-
gali in solio Viros sedere Europa inspexerit mode-
stissimos et continentissimos, qui ob acerrimum
tuendae publicae salutis, promovendaeque felicitatis

studium non solum oculos populorum suae curae commissorum in sui admirationem inflexerint , verum etiam eorundem animos fide sibi ac observantia devinxerint singulari . Ita scilicet universi orbis providentissimus Gubernator monitos quidem Reges voluit , ne credita sibi potestate contra communis officii normam abuterentur : populos autem , ne plus aequo blandientis eloquentiae lenocinio ab perversis hominibus capi se sinerent : cum perspectum haberent magis sibi amandam , quam formidandam potentiam illius Regis , qui non tam Dominus , quam Pater ipsorum utilitati curandae et coercendae pravorum licentiae esset a Deo constitutus .

Neque vero mihi opus est singulos percensere quos ipsi aut non multo antea vidimus , aut etiamnum videmus rerum summam administrare , et quorum idcirco aut adhuc viget omnium infixam mentibus recordatio , aut aciem quotidiana capit humanissima et liberalissima regnandi ratio et disciplina . De his satis pro instituto meo a me dictum existimabo , si unum **VICTORIUM AMADEUM** nominavero , non ita pridem e vivis importuno fato praereptum , qui traditas sibi patrii regni habenas ita rexit , ut quamvis satis etiamdum vigente aetate arripuerit , et nonnisi jam ingravescente dimiserit ; dimittere tamen omnino non debuisse videbatur . Me-

moria retinet unusquisque nostrum quam acerbis
 quamque inusitatus moeror omnium perculerit ani-
 mos , cum primum nunciatum est , VICTORIUM
 diem supremum obiisse . Atqui duos jam annos tam
 infirma erat valetudine , ut suis metum non semel
 injecerit , ne optimo Principe amantissimoque Pa-
 rente in summis rerum angustiis et difficultatibus
 orbarentur . Fama scilicet jam ex illo tempore , quo
 is coepit imperii frenum moderari , longe lateque
 percrebuerat : in uno VICTORIO omnes eximii
 gentium rectoris dotes , ac decora conspirare . Haec
 ego mecum recolens , cum gravissima mihi et sale-
 brosa de tanto Rege apud te dicendi provincia fuit
 demandata , verebar plurimum , ne illatus animo tuo
 ex ejus interitu dolor exinde sane recruderet , un-
 de ipsi laus profectura esset maxima et sempiterna .
 Ubi vero memini , Te qua es insigni constantia et
 fortitudine molestissimam quamque vicissitudinem
 strenue semper et aequanimiter tulisse , nihil autem
 habuisse antiquius , quam ut eos vel patrocinio fo-
 veres , vel proemiis alliceret atque hortareris , vel
 palam praedicandos efferendosque curares , quos aut
 ingenio aut opera aut consilio et auctoritate de re-
 publica deque religione benemereri comperisses , ubi ,
 inquam , mihi venerunt in mentem haec atque alia egre-
 gia ac pene divina tuae voluntatis argumenta , nihil

porro neque timendum mihi neque fluctuandum esse existimavi , quominus quae de amplissimo Principe dicenda forent coram Te eidem suprema solvente liberè omnia dicerem , etiamsi cum luctuosae ejus mortis atrocissima recordatione necessario conjunctum iri non ignorarem .

Jam ut ad rem veniam hinc omnis ducet initium , huc desinet oratio mea , ut ostendam VICTORIUM AMEDEUM ad regni gubernacula natura ipsa plane factum , educatione comparatum , usu et experientia regnandi cum suis tum alienis se apprime idoneum probasse , qui Regis partes pro dignitate sustineret . Tuum est , BEATISSIME PATER , quo auctore , atque auspice tantum onus susceperim , singulari humanitate tua audiendique diligentia ita me erigere et confirmare , ut sin minus pro rei praestantia , locique amplitudine dixerò , in haec saltem videar conatum omnem intendisse .

Duo in primis valere plurimum sentio , et esse propemodum necessaria , ut quis in praeclara qualibet facultate praestare possit ; insitam videlicet ad ejus rite incundam palaestram alacritatem cum diuturno , improboque in eadem perlustranda studio , et exercitatione conjunctam . Aegre enim quae ad rem opus fuerint persequaris et calleas , ubi animo in illam hebetes sis , vel alieno . Si vero industriam ode-

ris, disciplinamque neglexeris, in proposito ad percurrentum stadio pari nunquam cum laude et celeritate proficies. Quod quidem eo potiori jure ad illos arbitror pertinere, quibus incumbit ceteris praeesse ac dominari; quo magis arduum et periculosae plenum aleae opus tractare ipsos oportet. Jam vero quamquam diffiteri non ausim aliquos interdum extitisse, qui cum vel nullis vel parum solidis praeceptis institutisque informati ad rempublicam accessissent, graves ac solertes magistratus aut principes excellenti quodam ipsius naturae habitu se probavere: nonnullos etiam regnandi gloria satis floruisse, quod inolita a natura vitia diligenti diuturnaue opera et labore eluenda aut emendanda curassent; inficiari tamen posse neminem puto, si quando cum natura illustri et liberali sapiens atque accurata educatio consenserit, tum ad Regis probatissimi gerendam personam nihil jam desiderandum superesse. Quare etiamsi nunquam ad regni culmen pervenisset VICTORIUS; nihilominus ex hoc ipso certo ominari unicuique liceret bene sapienterque regnaturum fuisse, quod praesentissimis hisce praesidiis et adiumentis ad regnandum instructus foret ac comparatus. Ne te diutius teneam, BEATISSIME PATER, naturam illi hac in re largam et munificam se praebuisse facile possim evincere, si in eorum

velim ire sententiam , qui opinantur plurimum ex avitis laudibus , a sanguinis communione in sobolem derivari . Satis enim esset commemorare AMADEOS , EMMANUELES , aliosque , quorum gloria in Sabaudae stirpis ditione temperanda , rebusque tam pace quam bello praeclare gestis illustranda adhuc viget et vigebit in aeternam memoriam posteritatis . Ego vero cum facile patior majorum virtute laudari homines , in quos quippe eadem dimanare aliqua ex parte valeat : tum illud experientia duce compertum habeo , avitae laudis germina non raro ab nativa praestantia degenerare . Quamquam quid mihi opus foret alibi argumenta quaerere , quae in ipso , quem laudaturus sum , Principe ultro se offerant plurima et maxima ?

Quotiescumque VICTORIUM adhuc puerum aut adolescentulum recolo , luculenta mihi in eo exhibetur imago illius viri lectissimi , quem Deus olim ad populi sui praesidium , et regimen vel a primo aetatis flore selegerat . Nihil is jam tum leve , puerile nihil praeferebat . Pascendo gregi a patre addictus impositum sibi munus strenuè ac naviter gerere : in castris alacris , et impavidus , in aula modestus ac temperatus , parenti obsequens , Saulis dicto audiens quaecumque idem jussisset maturè aggredi ac solerter perficere : in omni fortuna rerumque vicissitu-



dine tueri officium , aequanimitatem servare : quibus aliisque hujusmodi probatissimae indolis experimentis quasi proludens se compararet ad populum frequentissimum aequissimis legibus instituendum , ad Dei cultum a quovis ethnicae superstitionis naevo vindicandum , ad mores rite componendos , ad infensissimos hostes profligandos , ad acerbissima vitae discrimina fortiter obeunda . At enim nonne his apprime consona licuit conspiciari in VICTORII pueritia et adolescentia ad bona et praeclara quaeque nati ingenii monumenta ? In ejus scilicet non modo factis , sed vultu etiam habituque corporis eminebat mentis alacritas , animi magnitudo , discendi ardor , pietatis et continentiae studium singulare . Praeterea difficile dictu est , quo semper fuerit in parentes et necessarios amore et observantia , in praeceptores curatoresque officio , qua in inferiores facilitate , indulgentia in aequales , miseris opitulandi proclivitate , honestum quidquam , vel utile audentes fovendi excitandique contentione . Ut quod olim de Trajano dictum accepimus , si nondum satis constaret , an aliquo Numine rectores terris darentur , indubium tamen foret Principem , de quo sermo procedit , divinitus constitutum ; imo , quod certissimo Dei oraculo de filio Jesse est praedicatum , eundem fuisse inventum , qui ex divini cordis sententia dominaretur .

Quid si haec opima virtutum semina a natura seu verius a naturae providentissimo Auctore ejus animo insita quotidianis et exquisitis monitis praeceptisque uberibus quasi aquis irrigata eo fuerint sensim adducta , ut nativam commode et abunde fecunditatem explicarent? Quid , si cum egregiis summorum virorum monumentis , quae illi ex sacra et profana historia suppetere consueverunt , domestica pariter moderationis aequanimitatis beneficentiae religionis exempla conspiraverint , quibus ob oculos passim obversantibus , subjectis veluti facibus inflammari ipsum necesse erat ad amplissimam quamque et honestissimam rem capessendam vel exercendam? Praesertim vero cum in parentem optimum CAROLUM EMMANUELEM spectaret , de cujus magnis atque permultis in christianam aequae ac civilem rempublicam meritis neque hic est dicendi locus , neque plura dici possent quam quae adhuc Europa grato animi sensu et jucundissima recordatione admiratur et praedicat : quique cum carissimum filium integerrimis , eruditissimisque viris instituendum tradidisset , tum sese illi tamquam exemplar ad imitandum proposuit , in quo quidquid eximium studio et disciplina didicisset aptissimis prope effectum coloribus contemplaretur .

Verum tot inter ad integre sapienterque viven-

dum incitamenta et subsidia non deerant obstacula quae superare , non offendicula a quibus praecavere , non hostes quibuscum congredi et decertare illum oporteret : cujusmodi obtigisse Davidi antequam solium conscenderet divina testatur historia . Illos dico motus cupiditatum , illas voluptatis illecebras , quae ut unumquemque hominum in ipso juventutis flore acriter solent impetere et agere in transversum conantur ; ita multo ipsos vehementius afficere dignoscuntur , si novas insuper vires capiant ab aulae pompa et luxu , a praeclaris majorum insignibus , a regio cultu et amplitudine , a fucato assentatorum alloquio , aliisque id genus benemultis , quibus redundant laqueata principum tecta periculosissimis animorum blandimentis . At quam haec ei fraudem parare aut inferre vim poterant , qui jam a teneris , ut ajunt , unguiculis nihil aggredi nihilque moliri consueverat , quod non ad rationis et honestatis normam expendisset ? Qui paulo firmiore aevo totus eo incubuit , ut sapientum placitis et optimarum disciplinarum opibus mentem imbueret animumque formaret : qui eam nactus temporum iniquitatem , cum scriptis undique scateret Europa pestiferum lascivientis Philosophiae virus et foedissima opinionum monstra praeferentibus , illorum maxime lectione delectabatur , unde purissimum solidioris do-

ctrinae succum haurire, et intemeratae veritatis derivare candorem in se posse intelligeret : qui denique (quod rectae absolutissimaeque disciplinae caput est ac fundamentum) illud haberet propositum, catholicam imprimis religionem cogitandi, agendique sequi magistram ac ducem, et quidquid ab illius vel minimum deflecteret documentis atque institutis prorsus refugere atque aversari? Noverat quippe alteque infixum retinebat et luculentis parentum exemplis et quotidianis praeceptorum monitis, et sua ipse in sacris litteris evolvendis meditandisque assiduitate et solertia, nihil esse homine dignius, nihil ad vitae cursum honestè casteque transigendum, nihil ad publicam incolumitatem felicitatemque servandam ac provehendam magis necessarium religione a Deo tradita et Christi ore expedita et commendata. In quam unam si intueri non desinas, perspectum habes et cognitum quid vere utile sit, quid honestum, quid liceat, quid non item, quid tibi, quid aliis debeas, qua ratione tuis idem commodis et communi humani generis bono certissimè valeas copioseque consulere. Mirum illud profecto ac monstro simile, quod cum vel a remotissimis antiquitatis saeculis omnes legumlatores et gentium imperio praefecti principes maximas curas et cogitationes in religionem intenderint; nos in tanta ingeniorum alacritate

te et omnigenae eruditionis luce eo devenerimus , ut illa ad constituendam gerendamque rempublicam vix ac ne vix quidem conferri existimetur oportere : pene ac si humana Societas , ut valeat et coalescat , religionis minime indigeat praesidio , et sibi relicta hominis ratio scitè providere et praestare bene omnia possit , quae singula in civili corpore membra suo sibi jure propria adsciscunt , quaeque idem ab unoquoque ipsorum deberi sibi contendit . Absit vero , ut tam prave tamque praepostere non dicam sentiat VICTORIUS , sed ne id suspicetur quidem aut fingat , cui persuasum foret , religione sublata , fidem justitiam concordiam veram quamlibet solidamque virtutem frustra inter mortales desiderari , eamque unam aptissimum esse mutuae necessitudinis vinculum , et praecipuum felicitatis tum privatae tum publicae firmamentum .

Qui hoc fuerit animo cum adhuc inter privatos ageret , quique tam praesentibus ad bene regnandum opibus et incitamentis adjuvaretur , mirabimur ne , quod regem exinde amplissimum beneficentissimumque se gesserit ? Mirandum foret potius , si quod de Joas sacris Hebraeorum fastis edocemur , solio potitus et aetate confirmata a pristina bene temperatae vitae consuetudine et optime de aliis merendi studio praeter omnium expectationem defecisset . Sed

propositi tenax VICTORIUS Davidem institit aemulari , qui ubi primum Judaicum populum regendum suscepit , nihil reliquum fecit , ut improborum vim poenae severitate coerceret , excitatas regno superiore turbas et opinionum dissidia componeret , ditionis suae fines ab hostium impetu tueretur , Israeli tranquillitatem et copiam compararet .

Neque porro defuit Principi nostro in ipso regnandi aditu incommodum sane deterrimum , cui maturè foret occurrendum . Gravis jampridem invaluerat Annonae caritas , quae majores in dies angustias portenderet , et extremam inopiam minitaretur . Quo sese vertit in tanto discrimine Rex humanissimus ? O plenum paternae pietatis et sapientiae consilium ! Cum probè teneat hujusmodi calamitatis molem in eam potissimum Populi classem incumbere , quae quotidiano labore atque industria victitare consuevit , publica extra ordinem opera , et substructiones indicit partim reficiendas , partim ex integro excitandas . Ita scilicet et laborantem praesenti ope multitudinem recreat atque sustentat , et novam Regni sui commodo et ornamento facere accessionem aggredditur . Datis interim gravissimis litteris ad complures Italiae aliasque maritimas Urbes , et eo missis cum ingenti auri pondere viris solertissimis , magna inde frumenti undique vis conquisita , atque in-

tra fines Taurinensis ditionis propere comportata squallorem abstersit ac maciem, quae omnium vultus infecerat, et corporum robur atque animorum laetitiam subito revocavit.

A tam faustis initiis jam tuto licebat coniicere quam prudens quam beneficus quam communis utilitatis studiosus in omne reliquum tempus futurus esset VICTORIUS. Quamquam non is tum primum isthaec animi ferme regii decora, et argumenta prae se tulit; quippe quae multos ante annos in eo coeperant eminere, quam regalem nactus esset potestatem. Magna semper feretur VICTORII laus ob insignem ejus in bene ac salubriter imperando solertiam ac facultatem donec Taurinense vigebit Athenaeum ipsius in primis opera auctoritate munificentia eo splendoris et dignitatis provectum, qua nunc videmus excellere omnis politioris litteraturae cultu et solidissimae cujusvis disciplinae gloria uberrimaque ingeniorum segete florentissimum. Hujusce autem augusti sapientiae domicilii jam tum jecerat fundamenta, cum pecuniam sibi a Parente in privatos usus permissam ultro devovit stabilien-
dae et amplificandae eruditissimorum Hominum societati, qui historiae praesertim, et matheseos laude celebrarentur, quorum doctrina non solum eximiam inter suos existimationem illis conciliavit; sed tota

late Italia ita est pervulgata, ut apud omnes magno in honore sint habiti, qui de litteris ac litterarum cultoribus aliquid possent judicare. Etenim qua mentis acie valebat minime vulgari, maturè compere- rat, nihil esse humano generi magis frugiferum et salutare, quam intelligendi vis et alacritas, hone- stissimarumque facultatum decus et incrementum. Di- dicerat itidem probatissimorum Scriptorum testimo- nio Romanum Imperium sub Augusto non tam opi- bus armis potentia fortitudine bellandi virtute vin- cendi felicitate artium nitore et industria, quam rei litterariae studio atque amplitudine fuisse maxime commendatum; Graeciam vero quamdiu scientia, et eruditione praestitit, omni cum civili tum bellica lau- de domi et militiae praestitisse. Quapropter nullam sibi curam omittendam esse censuit, ut validissima quae posset eis festinaret subsidia, quibus olim mo- derandis praeficeretur. Non absimili ductus consilio egenis et obscuro loco natis adolescentibus asylum aperuit, ubi et ad vitam necessaria illis suppeterent, et summa iidem credendi agendique ex Catholicae Religionis praescripto capita, et Italicae linguae ele- menta commodè accurateque docerentur. Ad hoc leges atque instituta studiosae juventuti ad ingre- diendum firmiterque insistendum bonarum artium iter excitandae atque adjuvandae quondam invec-ta resti- tuit amplificavit confirmavit.

Porro minime omnium latebat VICTORIUM, litteras et liberalissimas disciplinas parum prodesse Reipublicae, nisi artibus qua excolendis qua provehendis ad quotidianos vitae usus transferantur. Neque enim satis est sibi cives scire, nisi re ipsa palam fecerint caeteris quoque se scire. Neque Archimedes Demostenes Xenophon tamquam viri optime de patria meriti tantopere praedicarentur, si geometria eloquentia historia, qua ipsi mirum in modum pollebant, ad retundendum hostium impetum, ad abjectos et despondentes suorum animos erigendos, ad exercitus recte administrandos duce uti atque adju- trice neglexissent.

Nimius sim, BEATISSIME PATER, si ea omnia commemorare velim, quae praestitit Rex fortissimus ad Augustam Taurinorum aliasque Urbes honestandas aut communiendas, ad explicandum promovendumque commercium, ad utiles quaslibet ac quaestuosas artes invehendas expoliendasque. Quis enim enumeret publica aedificia, quae ab ipso perfecta sunt, aut a fundamentis excitata? Quis Temp- pla, quae plurima atque optima donavit supellectile splendideque exornavit? Avita sepulcra, quae Regio Ipse instauravit cultu amplificavitque? Quis idoneas recenseat ac percommodas in tot abruptis, atque asperis locis patefactas vias? Amplas item domus

viduis nobili genere excipiendis alendisque Matronis destinatas : tum arces exstructas , atque in meliorem formam redactas ? Illud tamen praeterire tacitus minime possum , quod ad mercaturam expediendam proferendamque nonnullis hanc exercere solitis magnam argenti vim dederit mutuam , unde maritimo commercio adaucto , pace praeterea cum Marochii Rege composita , eum sortitus est exitum , ut naves onerariae , Regio VICTORII Vexillo instructae ad remotissimas , et illis antea intentatas Terrarum plagas transmiserint . Quid de artibus dicam , illis praesertim quae ornatissimae nobilissimaeque putantur , de pictura scilicet sculptura musica aliisque minime vulgaribus , quae VICTORII auspiciis ad tantum decus pervenere , ut Italiae pars Sardiniae Regi subiecta cuiquam etsi florentissimae totius Europae Provinciae ea in re vix invideret ?

Jam ad reliqua festinantem intercipit quodammodo ac remoratur Agricultura , illa inquam ars parens societatis populorum alrix caeterarum itidem artium columnen et firmamentum . Cui quanta per eum accessio facta fuerit testatur ab eodem constitutus spectatissimorum aequae ac rei agrariae peritissimorum hominum caetus , quorum esset assiduo inquirere , solerter expendere , diligenter curare , quidquid soli ubertati et frugum copiae expedire potissi-

munum videretur . Caeterum cum mihi propositum sit de Rege hoc loco dicere , video multa VICTORII decora vel prorsus praetermittenda vel leviter praestringenda , frugalitatem modestiam facilitatem eisque similia , quibus privata caste ac temperanter vivendi ratio niti plurimum solet ac commendari . Verum aliqua haec inter occurrunt , quae quasi cognitione quadam cum regio munere et potestate continentur , ut alterum ex altero fas sit oratori arguere et confirmare : cuiusmodi conjugis praecipue et parentis esse officia curamque rei familiaris nemo inficietur . Hoc certe nomine apud Caesarem laudare non dubitavit regem Deiotarum romanae eloquentiae Princeps ; eosdemque olim habitos fuisse regendae multitudini maxime idoneos , qui optimi patresfamilias haberentur et forent , quique agris colendis pascendisque gregibus operam aut diligentiam intendissent , vetera sacrae juxta ac profanae historiae monumenta evincunt apertissime . Quae cum ita sint quis mihi jure succenseat , si VICTORIUM efferendum putem ex sincero animi affectu et indulgentia , qua regiam Uxorem est prosecutus ; tum ex studio in primis et solertia singulari , qua ad liberos bene religioseque educandos semper incubuit ? In quo profecto Regis laus eo magis elucet , quod in eis formandis regni sibi haeredes et successores se se for-

mare intelligeret . Ex his quam praeclara consilii sapientiae moderationis paternaeque in subditos charitatis dederit experimenta CAROLUS EMMANUEL cum primum imperii summam est nactus , jampri- dem accepimus ad nos uno omnium sermone delatum . Quid ita vero ? Nonne haec tanta istius gloria et expectatio illi magna ex parte tribuenda , qui filio dulcissimo nulla in re unquam defuit , quae modo regiam quamlibet virtutem ei valeret inspirare ?

Omnia hic commemorare , quae praestitit Pater amantissimus idemque diligentissimus , ut subjectis sibi gentibus amplissimum post se moderatorem beneficentissimumque relinqueret , necesse minime est coram te verba facienti BEATISSIME PATER , qui sacra dignum purpura judicaveris , et in curarum rerumque gravissimarum partem adsciveris Virum illum pietate fide maturitate doctrina nulli secundum , cui VICTORIUS EMMANUELEM instituendum informandumque commiserat . Eas potius juverit dotes dicendo persequi , quas certo proprioque verbo regias appellaveris : justitiam gravitatem beneficentiam liberalitatem constantiam aequanimitatem , in quibus singulis qualis quantusque fuerit VICTORIUS si pro rei natura , et magnitudine ostendere aggrediar , non ita facile possim orationis exi-

tum invenire . Quare faciam , quod Geographi solent , qui multiplicis lateque patentis regionis imaginem satis angustis inclusam spatiis exhibituri praecipuas tantum ejus partes describere satagunt , quae levioris esse momenti cognoverint , eorum inscripto nomine denotatis . Esto igitur gravem largum justum beneficium experti sint quicumque tandem soliti vel munere fungendi gratia ei praesto esse , vel ad eum in rebus dubiis aut profligatis confugere . Eo tamen plenius et luculentius in ipso se prodidit animi magnitudo atque constantia , quo praesentius adducta est in discrimen , quoque gravioribus cum obstaculis et inimicis ei fuit conflictandum .

Refugit mens recordari quam triste , et periculosum bellum aliquot abhinc annis Italiae fines invaserit . Quanta exinde instarent mala non solum ad populorum excidium , et Urbium agrorumque vastitatem , verum etiam in morum , et religionis perniciem jam ab aliis atque aliis terrarum plagis ad nos fama pertulerat . Jam pestiferum in ipso Italiae sinu virus serpebat : jam Italorum non paucos insana quaedam improbae effraenataeque licentiae cupido incesserat . Nullum ex alia parte satis tutum adversus impendentia discrimina et calamitates occurrebat perfugium , nulla nisi anceps optatissimae tranquillitatis concordiaeque restituendae patebat via . Eo

plane res inclinaverant , ubi vix consilio necessitas locum relinqueret . His implicatus et circumventus angustiis pacatissimo Rex ingenio in armis opem et praesidium ad suas regiones tutandas quaerere impellitur . Incertae praeliorum vicissitudines , adversariorum in pugnando ardor et pertinacia , maligna quaedam intestini dissidii et defectionis germina nondum fortasse funditus extirpata , publicae privataeque superioribus incommodis imminutae vires ardua omnia et salebrosa ostendebant : non ea tamen erant , quae Regis constantissimi frangere aut deiicere animum possent . Cum igitur ancipiti in concertando non semel usus esset fortuna , nonnulla etiam interdum detrimenta esset passus , nunquam tamen ab incoepto destitit ; et licet assiduis eisque molestissimis curis laboribusque attritus , et adversa demum valetudine debilitatus , ingentem belli molem intrepidus quatuor prope annos sustinuit .

Utinam constantiae suae uberes illos percepisset fructus , quos omnis Europa sperabat percepturum , bonique omnes sibi vehementer optabant , ei-que votis communibus ominabantur . Sed aliter illi visum est , qui populorum regumque sortes ex arbitrio moderatur ac versat : cuius imperio res serviunt atque obtemperant omnes quacumque orbis patet universus : cuius voluntati ac providentiae probi hone-

stique homines pariter ac perditissimi quique mortaliū obsequuntur . Quoties hic Hebraei populi tribus alias sui cultum integrum inviolatumque servantes , in aliarum perniciem compulit atque excitavit , si quae ab avitae religionis candore temere deflexissent ? Quoties ex ipso Abrahami genere principes a majorum institutis et per Moysen tradita Lege aberrantes in Israelē armavit aequissimis scelerum , et perfidiae suppliciis afficiendum ? Facessant aliquando si quibus propositum est omnia ad rationis trutinam expendere , omnia apud eam in iudicium vocare , de omnibus ex ejus sententia aut cognitione decernere ; quique nihil non humanis consiliis et viribus concedendum perperam arbitrantur . Infinitae ii tandem fascēs submittere non graventur providentissimaeque sapientiae , quae quo aequius ac maturius res cunctas administrat et regit , eo magis nostrae mentis aciem fugit ac superat facultatem . Id sibi verissimum certissimumque semper proponens VICTORIOUS , quemadmodum difficillimis maximeque periculosis temporibus nulli unquam contentioni nullique pepercit incommodo , ut publico bono et incolumitati consuleret ; ita si quid contra durum infestumque accidit , divinae sese ultro voluntati subiiciens pari animi firmitate excepit ac sustulit . Praestat hic memoria repetere Regem illum celebratissimum post

Saulem Israeliticae genti Deo auctore praepositum, qui quam strenuus fuit in teterrimorum hostium retundenda audacia et militiae laboribus periculisque obeundis, tam fortem ac temperatum se praebuit cum per ingratissimi filii ambitionem et scelus concitata in eum multitudine subitae fugae acerbissimos casus atrocissimasque suorum injurias impavidus devoravit; in quorum scilicet vi et impudentia ultricem Dei dexteram sibi inspiciendam statuisset.

Aliquot jam praeliis superiores discesserant Galli, rumor, ut fit, inclinatum ad eos belli fortunam praeter veritatem amplificaverat atque improvisum fluctuantibus Populis metum injecerat. Quo loco res sese habeant Regi nunciatur. Is propere coacto procerum concilio, quid in tam praesenti discrimine optimum factu sit diligenter inquit. Hinc praesidia subeunt. . . . Quid plura? Id enim tum praestitit prudentissimus Rex, quod sibi pro suorum populorum incolumitate praestandum esse duxit. Ad audendum scilicet hortabatur VICTORIUM regalis dignitas, cui, si cederet non levem instare labem et perniciem posset praevidere. Subditorum salus et vita agebatur, quae in novas foret clades necessario obicienda, si acie decernere institisset. Vicit in mitissimo Principe, qui a caede et sanguine vehementer abhorreret, vicit suorum amor et pietas. Cer-

ram eorum incolumitatem et pacem incertis bellimotibus et periculis etiam cum quolibet juris auctoritatisque regiae detrimento praefereendam esse decrevit; sic Davidis pariter aequanimitatem et mansuetudinem aemulatus, qui cum secum haberet delectam armatorum manum extrema quaeque pro eo experiri paratissimam, maluit a Regni Sede profugus et extorris proficisci, quam fidos corporis sui custodes omnemque civitatem in apertum discrimen adducere. In hanc porro Princeps religiosissimus eo facilius discessit sententiam, quo magis exploratum habebat quaecumque misera atque adversa adhuc evenerant, certo Dei nutu et consilio evenisse aequissimas a mortalibus impietatis et nequitiae poenas expetentis, cujus idem arbitrio Israelitici regis exemplo se ac sua omnia devoverat.

Mirum tibi fortasse visum sit, BEATISSIME PATER, quod de praestantissimo Christiani Principis decore, validissimoque rite ac sapienter regnandi praesidio atque adjumento pietate videlicet in summum universi Orbis Dominatorem et Catholicae Religionis studio vix quidquam adhuc attigerim. Quae ego quidem ad extremam orationis partem censui reservanda, non quod aut inter regias dotes levioris esse ponderis judicaverim, aut minus fortassis quam caeteras VICTORIO convenire, sed ut ex cla-

rissimis et plurimis , quae sub vitae exitum eorum praetulit argumentis facili coniectura unusquisque posset arguere quot quantaque annis superioribus dederit : quae profecto singula paribus prosequi verbis aggredientem a praestitutis dicendi finibus quam longissime avocassent . Ita scilicet mihi opus non erit immorari in ea expedienda , qua constanter antea usus erat religiosi hominis disciplina , modo intra domesticos parietes , modo in locis , ubi publicus supremo Numini cultus solet adhiberi : neque facilitatem efferre , qua regalem solebat majestatem delinire , si quando non dicam , aliquis Ecclesiae praesulum vel optimatum , sed privatus quisque Deo peculiari nomine mancipatus ad eum forte accederet aut exhibendi officii gratia , aut opem et patrocinium implorandi : neque observantiam singularem praedicare , qua Te et augustam hanc Petri Sedem jam tum est prosecutus , cum Regem agere coepit omnia statim de medio tollere adortus , si qua suberant , semina et incitamenta simultatis , omnia itidem ordinare et componere , quibus mutua concordia foveretur atque consisteret . Etenim rem me arbitrabor confecisse , si ea tantum subjecero , quae sub extremum vitae spatium piè religioseque gessisse illum accepimus . Eum quaeso tibi propone diem funestum oppido atque importunum , quo VICTORIUS improvisa vi morbi gra-

viter perculsus trepidantibus caeteris et luctu consternatis, ipse unus visus est non timere, et de instante vix interitu cogitare, tanta in ejus ore vultuque animi magnitudo tantaque firmitas eminebat. An non in illo tibi videris expressam integerrimi probatissimique viri intueri imaginem, qualis a Salomone commendatur, cui nempe nullum mors angorem nullumque metum sit allatura, quique cum castè sapienter moderatè aetatem omnem transegerit, tantum abest, ut extremi judicii severitatem reformidet, quin potius par benefactis proemium et immortalem gloriae coronam praestoletur? Libenter supersedeo a commemorandis verae solidaeque pietatis indiciis, quae ad supremum usque spiritum exhibuit multa et luculenta, ne dum optimi Principis memoriae laudique obsequor, inflictum cordi tuo ex acerbo ejus funere vulnus videar quodammodo refricare. Recolere potius praestiterit in quantam devenit jam nunc apud omnes bonos famae celebritatem egregius ejus Successor, qui regni sui initia clarissimis justitiae moderationis parsimoniae prudentiae religionis exemplis consecraverit. Ut merito liceat de ipso dicere, quod de Josia scriptum legimus, quo ferme tempore flagitia maxime invaluerant in pietate firmissime perstitisse, de amplissimo autem ejus Parente palam praedicare, ipso vita functo, ejus semen

et gloriam minime defecisse . Mecum enim ipse reputans , quae CAROLUS EMMANUEL ingenii animique regii praesetulit documenta tum vel ab ineunte aetate , donec intra privatae conditionis versatus est fines , tum praesertim ex quo avito solio consedit , adhuc spirantem intueri mihi videor VICTORIUM AMADEUM , quem ad gravissima Regis munia scite diligenterque obeunda natura compararit , disciplina formaverit , regnandi exercitatio et consuetudo perfecit et confirmavit .



L. J. de Schutten del.

Carlo Antonini sc.

94-E
19766

